

Okerrera egin zuten atzo Kanputxeako enfrentamenduek

PHOM PENH

Igandean hasi eta datorren asteko ostiralean burutzeak diren hauteskundeak gerturatu ahala egoera larri okertzen ari da Kanputxean. Atzo bertan, Gobernuak indarren eta gerrilarien artean enfrentamendu gogorrak izan ziren ipar-ekialdean. Nazio Batuek bertan dituzten iturriek jakinarazi zuten, aurkako indarrek borroka gogorretan eman dituzte azken egun hauek eta atzoko erasoak bortitzak izan ziren benetan. Gobernuak 200 soldadu eta Khmer Gorriak gerrilari taldeko 120 kideak gora aritu ziren Siem Reap probintziako borroka hauetan.

Azken lau egunetan bigarren, bertako aireportua bonbardatu zuten atzo Khmer Gorriek. NBEk atzo baieztatu zuten, kontrol dorretik kilometro erdira lau obus lehortarazi zituzten gerrilariak. Ostean itxi egin behar izan zuten Siem Reap probintziako aireportua.

PROZESUA EZ DA ETEN

Hauteskundeak hasiko diren eguna gerturatu ari den bitartean erasoak gora egiten dutela baieztatu ondoren Butros Gali Nazio Batutako idazkari nagusiak egoeraren berri eman berri dio Segurtasun Kontseiluari. Diplomatiako egipitiarraren arabera, Khmer Gorriak hauteskundeak geldiarazi nahian dabilzan arren Kanputxeako indar gehienak daude bake prozesua burutzearen alde.

«Biolentziaren bidez hauteskunde prozesua eten nahian dabilza eta Parisen hitzartutako akordioak bortxatzen», adierazi zion Galik Segurtasun Kontseiluari. Hala ere, Kanputxeako 4,7 milioi herritarrek —hautesleak— % 96 gutxi gora-behera baino gehiagok dagoeneko erroldetan izena eman dutela adierazi zuten.

Txostenak baieztatzen duenez, «apirilaren 7tik —kanpaina era ofizialean zabaldu zen eguna— hauteskundeetan parte hartzeak izena eman duten 20 alderdiak kanpaina indartsuak egiten ari dira», eta zenbaitek prozesua bertan behera uzteko eskatu zuten arren, Batzorde Nazional Gorenak aurrera jarraitzea erabaki zuen.



Bosniako gerrilari serbiarrak Brcko hiritik gertuko herri batean maniobrak egiten.

REUTER

Su etenerako akordio «sendoa» lortu dute kroaziar eta musulmanek

Bosniaren iraupena zalantzan jartzen hasiak dira nazioartean

Bosnia-Herzegovinako Mostar, Zenica eta Travnik probintzietarako su etenerako akordioa erdietsi zuten herenegun gauean buruzagi kroaziarrek eta musulmanek, atzo gerra fronteetan borroka ahuldu egin ziren bitartean. Hala ere, errepublikaren osotasunari eustea zalantzan jartzen hasi dira nazioartean eta Vance-Owen bake planaren bideragarritasuna ere bai.

DONOSTIA

«Akordio sendoak lortu dituzte bi aldeek» azaldu zuen Lord David Owen Europako Komunitateko artekariak, Thornvald Stoltenberg Nazio Batuetakoarekin batera, Franjo Tudjman eta Alija Izetbegovic Kroazia eta Bosniako lehendakariak izandako bileraren ostean. Lehendabiziko emaitza positiboa gauzatu da dagoeneko; izan ere, atzo Bosnia Irratiak azaldu zuenez, armada kroaziarra eta musulmana Mostarreko fronteetatik erretiratu egin dira. Bosniako Bake Konferentziako bi lehendakariak Kroazia eta Bosniako buruzagi nagusiekin erdietsitako akordioa Mostar probintziari (zortzigarrena) —% 67 kroaziarrek dira

eta % 25 musulmanak— Zenicari (bederatzigarrena) —% 59 musulmanak eta % 19 kroaziarrek— eta Travnik (hamargarrena) —% 45 kroaziarrek eta % 41 musulmanak— dagokie.

Musulman eta kroaziarren arteko eskualde horretako gatazkak, bi aldeek Vance-Owen bake planeko mapen zatiketa onartu ostean, kroaziarrek «bereak» ziren probintzietan gehiengo musulmaneko hiriak beren agindupean jarri nahi izan zituztenean piztu ziren. Mostarren —izen bereko probintziako hiriburua— eman zen egoerarik kritikoen, musulmanak % 34,8 eta kroaziarrek % 33,8 baitira. Antzeko egoera gertatu zen Jablanica eta Konjicen —zortzigarren eta hamargarren probintzietako hiriak— kroaziarrek musulmanak herritarren % 72 eta % 54 diren hiri hauek kontrolpean hartu nahi izan zituztenean.

BOSNIA LEHETZEKO ARRISKUA

David Owenek bi aldeetako agintariei gogora arazi zien kroaziar eta musulmanek elkarbizitzetik ez badute Bosnia-Herzegovina ere ez dela egongo. Hau da lehendabiziko aldian Owenek independentzia ezagutu zuenetik gerran bizi izan den errepublikaren iraupena zalantzan jarri duen lehendabiziko aldian. Bill Clinton EEBBetako lehendakariak ere antzeko adierazpenak egin zituen, Vance-

Owen plana bideragarri ote zen zalantzan jarri zuenean. Estatu honen bizi iraupenerako eta Nazio Batuen bake plana martxan jarri ahal izateko gerra egoera aldatu beharra dagoela uste du Clintonek, eta horretarako musulmanen aurkako arma enbargoa altxatzea baino beste biderik ez legokeela jakitera eman zuen herenegun.

Alois Mock Austriako Atzerri ministro eta Europako Kontseiluko behin-behineko lehendakariak ere nazioarteak baino ezin izango duela Bosnia-Herzegovina salbatu adierazi zuen atzo. Bere ustez, nazioarteak esku hartu ezean, «Bosnia-Herzegovina lehertu egingo da». Austria, EEBBen moduan, serbiarren garaipenak geldi arazteko bonbardaketa selektiboen alde dago, eta eskuhartze militarrean laguntzeko prest legokeela azaldu zuen Mockek, mendealdeko aliatuek halakorik erabakiz gero. Warren Christopher Atzerri ministro estatubatuarrek mendealdeko aliatuekin kontsultak birreriki ditu lehendabiziko saialdian huts egin ostean.

ANOETAKO HERRI IKASTOLAK

25. urteurrena ospatzen du. Beste zenbait ekintzen artean, ekainaren 5an, afari bat antolatu dugu GURASO IKASLE OHI ETA IRAKASLE OHientzat.

Etorri nahi baduzu, dei ezazu ikastolara maiatzaren 28rako.

Tel.: 65 46 13

LABURREAN

LITUANIATik tropak garaiz erretiratuko ditu Moskuk

Pavel Grabtxov Errusiako Defentsa ministroak bere tropak Lituaniatik agindutako epeetan erretiratuko direla berretsi zuen atzo, nahiz eta arazo teknikoak handiak direla azpimarkatu. Algirdas Brazauskas Lituaniako lehendakariarekin bildu ondoren, Letonia eta Estoniarekin negoziatzeko asmoa dutela aurreratu zuen Defentsa ministro errusiarrak ●

KARABAKH

Garairako bake plana jaso dute hiru aldeek

Estatu Batuek, Errusiak eta Turkiak Karabakh Garairako eraturiko bake plana herenegun jaso zuten gerra honetan nahasiak dauden hiru aldeek. Aurrekoari zenbait ukitu egin dizkion egitasmo honek Azerbaidjanen oniritzia jaso du dagoeneko. Armenia zer erantzungo duen aztertzen ari da, eta Karabakh Garaiak berriz negoziaketei ekiteko eskatu du ●

MIAMI n baztertuta ingelesaren esklusibitatea

Miami eta inguruak biltzen dituen Dade konderriko Batzordeak aho batez baztertu zuen herenegun ingeles hizkuntzaren eksklusibitateari buruzko agindu federala. Florida hegoaldean gaztelera da bertako herritarren % 52ren ama hizkuntza. Dade konderriko batzordea sei hispanok, lau beltzek eta jatorri anglosaxoiko hiru kidek osatzen dute ●

GOBELA IKASTOLA

EZOHIZKO ASANBLADA OROKORRERAKO DEIALDIA.

Bazkide guztiei dei egiten zaie, datorren ostegunera, 1993ko maiatzak 20, arratsaldeko 7etan, ikastolan, ondorengo gai zerrendarekin.

Gaur egungo egoera berdinean mantentzea edo sare publikoan sartzeari buruzko:

1.- Informazioa.

2.- Joan den asanbladan erabaki zen moduan, txosten eta proposamen berrien azterketa.

3.- Erabakia hartu.

4.- Galde erantzunak.

Oharra: Guraso guztiak, gaur egun seme-alabarik ikastolan izan ez arren, bazkide kooperatibistak dira.

ZUZENDARITZA BATZORDEA



INTXAURRE
HERRIKO
TABERNA

Intxaurrondo, 2
DURANGO